

RESAKA FIFIDIANANA. TSY NISY NANDRITRA NY 60 TAONA

Ministry ny fanatanjahantena mamory sefo fokontany

Mbola tsy nisy tao anatin'ny 60 taona izany ministry ny fanatanjahantena mamory sefo fokontany izany, mikasika resaka fifidianana. Raha nanontaniana ireo sefompokontany dia valinteny tsotra ny valiny: resaka mikasika fifidianana no natao tao ary nisy sahady ny fizarana vola, saingy tsy nanome maribola kosa ireo sefompokontany nanontaniana. Tato ho ato, hita matetika ato Menabe ity minisitra Tinoka Roberto ity ary efa nanavao ny mpitarika ny Mapar ato Menabe, ka isan'ny nahagaga ny maro ny nametrany ny talem-paritry ny fanabeazam-pirenena hitarika ny TGV ato Menabe, ahiana hoy ireo ray aman-drenin'ny mpianatra ny hanaovana ny fanabeazana ato Menabe ho fitaovana politika. Miahiahy koa ireo talen-tsekoly sy sefo Zap, ny hisian'ny ramatahora raha tsy manaraka ny baiko politika ataon'ingahy talem-paritra.



Ministry ny fanatanjahantena, namory sefo fokontany momba ny resaka fifidianana.

Rajepa

Helian Ralison, Malagasy any ivelany

Feno ny kapoaka raha ny zava-misy eto amintsika ankehitriny

Naneho ny heviny mahakasika ny raharaham-pirenena eto an-tanindrazana i Helian Ralison, Malagasy monina any ivelany. Aminy dia efa feno ny kapoaka ankehitriny raha ny zava-misy aty Madagasikara:



Helian Ralison, Malagasy monina any an-dafy.

“Manoloana ny fahalovan'ny lafim-piainan'ny Malagasy ankehitriny, dia sarotra ny mbola hana-marina fahanginana na filazàna fa tsy manao politika. Satria vitsy dia vitsy ny sarangan'olona tsy voakasik'izao mianjady amin'ny vahoaka izao, eny fa na dia hitoka-monina ary eto amin'ity Nosy ity dia tsy maintsy ho tratory ny fahasaratana. Ary manao fanahy iniana mitampy-maso mihitsy ka tsy ahita ny vokatra ny fahantàna amin'ny isam-batan'olona na koa eo amin'ny fiaraha-monina.

tana ny fahaverezanao sisa ianao izany. Sarotra ny manaiky izany kanefa izay no zava-misy iarahamahita.

Mbola tsy mahatsapa ve ianao fa ny hasin'ny maha olona mihitsy ankehitriny no hitsahina, satria fitondrana mandrendrika ny Malagasy ny fahefàna politika misy izao?

Mbola tsy tonga saina ve ianao fa ny hetsika rendrarendra sisa no asesik'ireo mpitondra, anarontsaronana ny tsy fahaizamitantana sy ny kolikoly isan-karazany, maha voakitikit'azy rehetra ireo? Sarotra ny tsy hino fa raha olon-kafa no ao ambadik'ireny fanondranana

antsokosoko volamena ireny, dia efa fantatra daholo ny anarany.

Mbola misy antenaina ve ny hahatsara ny fiharin-karena eto Madagasikara, kanefa ny lalàna dia tsy miaro ny marina fa miaro ireo ao anaty fitondrana? Mbola tsy ampy ve ny tranga mampiseho fa giazan'ny ao amin'ny fitondrana ny sehatra fihariana rehetra, izay ahitan-tombony haingana sy betsaka?

Tsy efa mazava ve fa efa manompana ny heriny ireo mpitondra hanamafisana ny toerany sy mitady hamerina “doublons” amin'ny fifidianana?

Maro ireo tranga hafa manohy ireo voalaza ireo, fa amin'izao ankatoky ny fitondrotam-bidim-piainana faobe izao dia vao maika hanampy totraka ny hirifirin'ny toetr'andro izany. Tsy ho vitan'ny fisentosentoana intsony anefa ny miatrika izany.

Mitaky fiovàna avy amin'ny isam-batan'olona izany, ka na eo anivon'ny fianakaviana, na mpiray fokontany, na mpiara-miasa, na mpiray fiangoanana dia

mila mijoro maneho ny tsy fanekena intsony izao famonoana vahoaka izao.

Miainga avy amin'ny tsirairay izany, eny fa na tsy mifandraika amin'ny toetsaina Malagasy aza ny fahasahiana miteny dia tokony hanao izany ho fanavotana ireo taranaka mandimby. Mitaky fivoahana amin'ny fitiavan-tena izany ary dingana lehibe fampisehoana, fa tena tia Tanindrazana ny malagasy.

Tsy mendrika ny Malagasy ny mitazam-potsiny ny fireneny hatsonika anaty fahantàna lalina. Olom-bitsy nandrombaka fahefàna tamin'ny fomba mamohetra no mitondra sy tompon'andraikitra feno amin'izao fidinana andavaka izao, ka raiso ny hery raha tsy te ho levona miaraka amin'ny tahotra ny ho avinao.

Koa sahia miseho ho olom-pirenena, mijoro manala ny zioagam-panandevozana vaovao raha toa tena feno tokoa ny kapoaka! “ hoy ny fanehoan-kevitr'ity Malagasy monina any an-dafy ity.

Nangonin'Isambilo

Fiaraha-miasa amin'ny any ivelany

Nandalo an'i Morondava ny sambo 2 lehibe an'ny tafika Frantsay sy Malagasy

Ny 4 jolay tokony ho tamin'ny roa ora maraina no nigadona tao amin'ny fari-dranomasin'i Morondava ny sambo 2 lehibe an'ny tafika frantsay “ Champlein “ sy ny tafika Malagasy “Tselatra”, izay notronin'ny prefet ny Morondava, sy ireo lehibem-pibaikona ny fitandroana ny filaminana ato Menabe, nahitana ny avy ao amin'ny zandarimaria sy ny tafika Malagasy. Ao anatin'ny fiaraha-miasan'ny tafika frantsay sy ny tafika Malagasy izao hetsika izao, izay misy ny fifanakalozana eo amin'ny tafika roa-tonta sy ny fanamafisana ny fisafoana ny

fari-dranomasina Malagasy ary ihany koa ny fametrahana ny inter-arme Malagasy. Nivoitra nandritr'izao fandalovan'ireto sambo ireto izao, fa milamina ny fari-dranomasin'i Menabe, na dia misy aza ireo vaovao azo hoy ny LV Andriamanjaka dia misy ireo sambo vahiny manao fitrandrahana tsy ara-dalàna ato amin'ny ranomasin'i Morondava dia tsy nahitana izany tamin'izao fisafoana nataon'izy ireo izao, mety noho ny toetr'andro izay somary ratsiratsy tao ho ao angamba hoy izy no antony . Ny tanjona izao dia ny mba ho fiarovana ny mo-

rontsiraka sy ny mba hisy fizarana traikafa eo amin'ny samy tafika an-dranomasina: Malagasy sy Frantsay. Hita taratra nandritra izany, fa mbola lavitra ny ezaka ara-pitaovana ho an'ny tafika Malagasy, raha mitaha amin'ny tafika frantsay, satria raha “Tselatra “ no sambon'ny tafika Malagasy lehibe indrindra dia kely sady bitika raha mitaha amin'ny “ Champlein “ sambo kely indrindra ao amin'ny tafika frantsay izay avo folo eny amin'ny “Tselatra”. Isan'ny fanirian'ny maro ny mba hananan'ny faritra Menabe sambo toa an'ny sambo “Tselatra”, saingy

mbola nofinofy izany na dia hita ary fa tena tokony hisy sambo, mba hampiasaina amin'ny fitandroana ny filaminana an-dranomasina ato Menabe. Sarotra ihany koa ny hanatanterahan'ity “Tselatra”, sambon'ny tafika Malagasy ity ny asany, satria dia mijanona eo amin'ny fanaraha-maso sy fanangonam-baovao ihany izy ireo, satria tsy manana fahefana hisambotra, fa mijanona eo amin'ny fisavana ihany ny asan'izy ireo, ka tsy main-tsy mandefa tatitra dia rafitra hafa koa ny manohy ny asa miaraka amin'izy ireo.

Rajepa

Ny Valosoa sy faka-faka

Tsy mahafehy intsony ny fisondrotry ny vidin'entana ny fitondrana

Ao anaty toe-draharaha mifamahofaho tanteraka ankehitriny ny vahoaka Malagasy, noho ny resaka sondrobidim-piainana, sy ny ho fiakaran'ny solika ato ho ato, na dia tsy mbola voafaritra mazava aza ny daty amin'izany. Efa mandrahona be ihany ny mpitatitra na eto an-drenivohitra sy ny manodidina na amin'ireo zotra reziônaly sy ny nasiônaly. Ho langilangy hidaroka ny ain-dehiben'ny sarambabem-bahoaka no mitatao amin'izao fotoana izao. Ho hatraiza ny vahaolana fanalefahana entin'ny fitondrana amin'izany ? Fitondrana mba miasa fe mba miasa no misy hitan'ny besinimaro, manoloana izany rehetra izany, fa ny fahoriam-bahoaka mitoetra eo ihany.

Tsy mitsaha-mitombo ny vidin'entana fanjifa andavanandro amin'izao fotoana izao, izay efa am-bolana maro no nitrangan'izany teto amin'ny firenena. Ireo vidin-tsakafo tena ilaina isan'andro mampikaikaika ny ray aman-dreny, satria ny vidiny tamin'ny herinandro lasa efa miova indray andro vitsy aty aoriana. Ary ny ho loza, na dia efa misy aza ray aman-dreny mba te-hiàla amin'ny fahasahiranana mafy amin'ny fividianana kojakojam-pianarana rehetra akaiky fidiran'ny mpianatra, ka mba mitady vahoolana mividy mialoha izao, dia indrisy, fa efa notatazan'ny fiakaran'ny vidin'entana sahady. Io fiakarana io, ohatra toy ny kahie, dia niakatra hatrany amin'ny manodidina ny 30 % sahady izao, mainka izany rehefa amin'ny volana aogositra na septambra. Tsy mbola niseho akory ny fiakaran'ny vidin-tsolika dia izany no mitranga. Amin'ity lafiny fampitaovana amin'ny fianarana ity, na ny fanampiana ny ray aman-dreny ho fanamaivanana ny enta-mavesatran'ny dia iarahamahita sy mahalala, fa kely endaka na tsy hita mazava izay hafitsoky ny fitondrana Rajoelina. Hetsika mtsitokotoko, fa tsy mahasehaka ny rehetra no hany vitany isan-taona.

Mazava loatra fa tsy ilaozan'ny fanararaotana ihany koa, no mahatonga izao fiakaram-bidy tsy mitsahatra eo amin'ny entana fanjifa andavanandro izao, sy ireo kojakojam-pianaran'ny mpianatra. Midika mazava ho tsy fahafehezan'izao fitondrana Rajoelina izao ny raharaha manahirana sy mamono ny vahoaka izany. Tsy manana fahaizana mitantan-draharaha sy ny zava-misy sarotra eto amin'ny firenena izany. Tsy atao hahagaga ihany koa anefa izany satria tsy niomana ny amin'izao ny mpitondra ankehitriny, fa may fotsiny handrombaka fitondrana sy hiaro tombontsoa. Ny manahirana, ny sarambabem-bahoaka no mibaby ny vokatra ny tsy fahaizany izay.

Sôh'son